

槐野先生存笱稿

槐野先生存笥稿卷之十

左輔王維楨著

館甥渭上南師仲編

志銘九首

明處士王公暨配碩人石氏合葬墓志銘

明安陽縣丞致仕半山郭公墓志銘

明封文林郎翰林院編脩裕菴歐陽公墓志銘

明浦城簿東丘余公墓志銘

明四川道監察御史雙洲嚴君墓志銘

明封戶部廣西司主事懷朴康公墓志銘

明王孺人趙氏墓志銘

王氏第二妹正儀壙銘

長女王淑姬壙銘

志銘

明處士王公暨配碩人石氏合葬墓志銘

王處士者華州故縣里人也諱時任字澤民其先世居州北石孟村以石孟徙故縣自諱能者始故縣卽唐鄭縣州西南望形隱起爲陵林煙藹鬱占謂宅者蕃子孫且貴其後能有子五人其一興學刑名從成祖皇帝北征駕還錄功擢爲金吾兵馬首領遷泗州吏目先娶宋氏生子來以歲貢爲露石主簿繼娶

趙氏生三子是爲處士母繼又娶梁氏又庶鄭氏又
生三子合七人處士于倫第四趙之殂也吏目念處
士幼抱置姑氏所姑氏養之比長績學習文試爲增
廣生增廣生有穎才奇氣工書書遂名縱所造卽科
第可指取乃性好酒一飲輒引滿大醉乃已一日醉
忽中風枯其半體由是業廢然竟不以故斷酒恒飲
恒醉醉後嘯歌睢睢如有所憤識者曰處士以疾阨
令志不展其怨之矣正德十五年八月四日坐疾卒
年五十八耳處士有子四人長堯輔早死次堯弼今
戶部主事次堯咨最次堯士率能立其家皆其配石

氏出石氏彌碩人碩人在室以端慤淑慎爲父母愛
子及嫁爲王氏婦也事繼母梁與庶母鄭先意順欲
一敬不怠二母賢之常稱之內外親妯娌五六輩性
行各異與朝夕無怨議者諸且盡爲之禮處士卒碩
人痛苦至疾遂督諸子咸抵于成諸子若婦見碩人
必整容侍側觀顏色進退碩人視之亦不以立故解
嚴里人曰振王宗者石也嘉靖二十三年壽八十一
歲以七月十日卒卒之時戶部在官訃聞且謁歸友
人王維楨走吊以別戶部杖拜哭已乃輟慟蹶起白
云往府君葬也固欲志不遂然念之今母啟府君封

以耐志則以累子又拜哭旣歸使使以故代州太守
楊南涯氏狀來徵予銘予與戶部同窮達甚善恨生
晚不幸不獲拜處士其行履則自長老傳聞者甚衆
大較爲人尚慷慨立然諾接人卽踈微咸適其意不
限畛域遇貴人亢族顧軒輊不少降今狀亦云辛卯
之歲予與楊氏得拜碩人于戶部家是時予三人者
皆舉人碩人已貴見之衣不御綺言儀敦樸予歸以
稱之母與妻狀稱碩人及見孫男女凡十一人王畿
王甸王笛王田王畬皆男畿甸戶部子畿母孺人出
聘庠生東希稷女甸側室張氏出聘聽選官高漢女

在言和
卷一
三
苗田畬堯士子馮氏出堯咨娶賈氏子未立以堯士
之中子畬權嗣生一女聘庠生吳宗道子建勳戶部
五女一適渭南李光先一適生員郭光裕父進舉人
一適張騰江李張弼鉅富一適鬻寶儒生許倌父默
齋御史中丞一適蒲城馬某父陞遠武昌府通判於
戲盛矣處士雖不及見後世若此然今談者孰不追
曰王處士子孫也葬得日爲卒年某月某日與之志
且銘曰

貴不于躬以貽厥後德卒用昌維天之明叶兮我
佳城于彼舍背峯回水洋惟地之良兮生也同室卒

也同窶二魄偕康維人之光我言則傳而石旣堅于
萬斯年曰處士阡

明安陽縣丞致仕半山郭公墓志銘

吾外舅安陽縣丞半山郭公以今年六月五日卒于
家其子曰岱者走介京師以書泣告曰嗟吾父竟坐
前疾不起矣且卒張目呼岱曰若銘我則累婚王太
史連呼曰致意致意四言言訖瞑于手書驚迷戰栗
書失墮地拾復讀則大哭已爲位再三哭擗楨之北
也卽其帷與公別公疾且稱已何謂其至是也痛哉
痛哉公兄弟二人稱鳳谷公者公兄也弘治中督學

遂菴楊公試華州士公及兄咸躋高等遂菴公極歎
之稱曰今二俊乃何避東氏子東氏者指副使葵軒
公之子今顯者四公時爲士有問望也然郭氏母實
葵軒翁同母弟葵軒之子若車駕公都運公御史公
刑部公斯四公者皆呼郭氏爲兄弟校業迺上下然
四公早達二俊乃愈益發憤增脩有試輒冠其曹至
大比則數困弗利鳳谷竟用貢爲滑縣丞公丞安陽
當其時與郭氏齊稱俊者又有管白泉氏後亦以阨
塞爲瀘州學官里人語曰無爲嶽嶽盍觀管郭言負
才氣不大售也初公之貢于大學也諸海內才蘊之

士無慮數百公與游皆輒敬伏之久之司成趙公聞
遣子來從曰郭生關中才也從之當益其雄在安陽
六年丞歷于令不專制大施所司皆米鹽細務一至
輒了乃曰爲嘯詠有所抑鬱不平盡泄之詩又爲教
民諶數十章咸剷文從質令易曉安陽人崔後渠先
生者以文章議論高一代鮮許可見公製每賞之公
旣高自負恃而守彰郡者又鄉里後生故嘗尊禮公
今爲下吏執絕公亦于于遇之少謹畏容竟以是中
傷之遂致仕歸歸之十年爲嘉靖丁未卒公諱從禮
字以行本蒲城人曾祖瑄以棲霞縣丞歸過華州樂

其勝著士遂爲華州人瑄子璽璽二子長曰經聞喜
主簿次日絃驛丞驛丞二子長從義彌鳳谷爲滑縣
丞者也次則公滑縣二子山爲寶慶通判岳爲大學
生公一子卽岱書顏體有名籍禮部儒士而又有岫
者爲江都主簿于公爲從子郭氏蓋世有衣冠云公
三女禎娶者季長嫁生員魏自脩魏父知縣次嫁生
員東夏夏祖吏部考功郎中皆碩人朱氏出朱氏爲
岱娶知縣李公傑女傑女賢岱有三子祐之祐之一
尚在抱郭氏雖世祿祿入隨費亡爲子孫立業故官
罷輒窘自公謝歸而管白泉氏者亦從瀘還二人者

倡里中長老約爲酒會旬六七舉不舉日公宴于家
岱及孫爲勸觴間逆諸女爲具食用客禮接之因遂
竭資然公竟不以貧故戚懷訢訢如也恢恢如也人
與居多親愛之亦每急人之難不言人之過其甥故
代州太守楊南涯氏取溫厚坦曠四字狀公惠信哉
疾比卒里中吊問者續接于戶公生成化九年五月
六日距卒年七十有五卽用卒年十月某日葬窆在
滑縣公右楨旣奉遺令次其生事始終遂銘曰
矯矯郭翁兮噫位卑才崇兮噫傑者固窮兮噫此屋
藿蓬兮噫彼棟隆隆兮噫

明封文林郎翰林院編脩裕菴歐陽公墓志銘

歐陽公者名倫字宗彝故翰林院編脩學章之父也
楨與學章共選舉數得拜公于官郎公樸貌而粹顏
溫詞而眷履每以爲有古君子長者之風焉故今爲
誌其墓石皆蒐實掇有非調語也公初爲士而習舉
子業治朱氏易甚解嘗推其指以驗人事往來進退
消長盈虛無弗合者則歎曰天人判者迹爾而其致
一也是故君子順天而弗違侯命而自信學且就會
其父聽選公攜其母李碩人遊在外聽選公文有母
于年旣高而又有二子曰夔曰龍者則幼皆在家公

以冢子領家幹故凡于之養及夔龍兩弟之抵于立
咸殫力任之由是學廢然日猶冀念聽選公歸則尋
復緒理竟所志久之聽選公歸而公之長子時季子
喚稱學童者業各露頂角爲聞士公曰吾既有子乃
遂弃儒而益事家人業然計疎家蓄乍羸乍縮羸卽
散卽食客卽贍族人至縮則蔬食布衾灑如也語人
曰今之居積算較者予知之矣飾裘馬厭口腹已耳
夫童齷視百年至遠也然奄忽至今且半安能營營
勞憊效世俗之所爲乎因自號曰裕菴而人亦遂稱
裕菴公云其後十餘歲喚果舉鄉試第一連舉進士

選翰林吉士時亦用選士除揚州府通州同知通州
距其鄉遠公憚弗就乃就暎及暎授編脩卽得封公
如其官以法封君見在官邸者令赴 闕庭謝 恩
公攝衣冠綴班行朝士羨之稱稀覲焉性謙厚卽爲
封君貴一如無有封之數年歸其鄉時年踰七十矣
常步歷城市中卽涉遠郊從車馬步出郭始就之故
武強人號歐氏爲德門恒推數而稱之曰時若暎似
其父封君封君似其父聽選公瓚瓚似其父鑑鑑似
其父榮福榮福父曰思温始自淮安之山陽遷武強
者也代遠莫能知由是言之歐氏蓋世有善士云初

公就編脩君至誠之曰我歐來累厚矣乃今逮爾小
子眷念哉眷念哉後編脩君以人言免官賜之書畧
曰夫昔之人被黜然或書空而咄遵澤而吟者豈不
以中有所鬱抑不得通其意哉吁亦隘矣夫達觀列
之大人造化託之小兒時榮與榮時淬與淬所謂知
天所謂順也而小子勉乎夫人言之興也其猶颺乎
始盤盤羊角轉也倏忽散漫石遭之捐木遇之折何
其烈也頃之定空青野寂幻乎莫執其迹而木石災
矣彼其捐而折者亦其數宜爾耶小子苟有省于吾
言則無繫官編脩君旣歸其兄通州君亦解官兩君

約日通具酒食各迎公過其家進觴稱壽諸孫從後
羅拜趨舞間復用公之命邀公之二弟夔龍者來共
飲食接懽公顧謂二子曰是樂人間亦少兒曹可云
功名蹇乎如此數歲卒寔嘉靖二十六年七月二十
一日也距其生成化五年十一月七日春秋七十有
九配李氏封孺人有二子一女嫁任秉常三孫筆第
皆大學生時出策邑庠生喚出筆又出韓第又出蘓
厥胤繁矣李孺人具婦德母儀以故佐夫而克昌其
後如此孺人有弟曰鳳吟故爲綏德太守今狀實綏
德爲之狀曰裕菴公有厚俗之行二焉盜少年之夜

騷閭里也閭人共苦之謀捕則請之官必死害乃已
他日捕獲之公勸衆釋之已乃戒曰吾今乃活汝汝
弗悛復爲盜嗣有捕者殺汝矣其人感泣遂竟不爲
盜嘗買田弗之省也令鬻者自質其直鬻者給公証
瘠田爲膏田要膏田直公信之卽予膏田直已乃覺
終不反質夫刺厲而儇黠者季世之通疾也以今裕
菴公觀之可謂矯薄化頑風教有裨者矣葬得日爲
卒之明年三月七日槨旣爲序其事遂銘曰

繫歐陽生徵漢博士而論石渠治逮歛者八世同官
厥轂奕如詢工書體詹善文詞悉重璠璣愈傳愈雋

廬陵永叔光被本初遙遙華閔聿自淮南徙于武居
爰有德人不歿其躬嗣詣公車啟祚流祥冠紳書史
繹繹徐徐柯茂惟本泉甘有源茲言非虛猗千萬世
考歐宗者石在玄廬

明浦城簿東丘公墓志銘

東丘余公者崇德縣人也名億字公悅以嘉靖庚子
六月十八日卒卒十二年而其孫田舉庚戌進士謁
其座主王子曰東丘公吾大父也葬未有銘今幸得
見先生願先生銘並以狀來狀則田同年侍御馬君
爲之按狀則東丘公者蓋遠然有古達士之風焉狀

曰東丘公父曰樂耕翁母曰舒氏生三子長曰仁次曰信次卽東丘公公生而機簪六七歲時卽嶄嶄露頭角樂耕翁愛而竒之私語舒曰昌吾家者季子也彼二子者竟且賴之甫十歲而樂耕翁亡舒涕泣曰教季子學卒吾君子之志而季子好讀書一再誦輒記年二十入爲縣學生而舒又亡季子痛二親鍾愛懼學未有就貽二親辱服旣除乃辭其二兄出從名師游焉旣三年乃歸暴名乃就有司試不第再三試又不第是時東丘公已逾三十或說之曰夫翡翠離越而貴章甫入魯而售者物固有所遭也以君之才

而數此不第君何不從都下試且獵者祝網不獲則
徒其處獨柰何撼促守一株也東丘公然之乃遂應
例貢入南京國子學因圖就南京試其時四方抱藝
之士雲集白下聞東丘公名咸卽訊採取之皆服以
爲出其下卽東丘公亦自以爲四方士今來集者莫
予若也比試又不第竟歸當是時會二兄相次卒又
皆無子兩家事無巨細悉來賂公公應之不爲厭兩
嫂各有女已嫁兩嫂聽女每出其藏餽女公亦不問
已乃割兩兄產半分與兩嫂女夫家而兩嫂則竟曲
爲供養不少傷其志凡此皆以勞費心神學遂廢

是余氏兩兄雖亡無助而蓄積田產轉振起東丘公以身專任故也其後東丘公年五十餘始來謁選吏部除爲福建浦城縣主簿主簿裨官歷于長吏不得自屈伸而簿固有才巡按御史庶知之乃檄簿督入縣逋簿往入縣逋應檄而完頃之浦界曠盜發殺人斷行旅長吏觀望莫誰何御史復檄簿平曠盜簿設計禽其魁數十人餘黨解散盜平簿在浦五年一物無所取獨勞勞奔命無休已時而年又漸高甚苦之日忽歎曰夫仕卑者不辭勤苦不羞跪伏効一命之職以五斗粟也其尊者積歲年望資缺至老白首

不肯歸爲顯名大爵也今吾產足自給終老而簿卽
勞見筋骨祇爲他人刈薪供炊耳自不得啜汁且格
在下僚卽錄之無大振拔吾何以簿爲哉夫鴻鵠九
天鷓鷯一枝各適所志也卽曰解冠著山人衣自買
舟載妻子歸其年嘉靖戊子也歸三年辛卯東丘公
壽六十里中衣冠與公結社爲觴味交者相約持肴
酒咸爲壽公其日宗族親黨履接于戶浦之民有持
其邑士大夫文徒步上壽者諸客咸驚問故壽者曰
夫自今簿去而後簿來也浦之民始知簿去而無簿
矣以故相議而遣吾壽東丘公老而好奕以爲奕勝

敗之數不可豫擬或始完而卒缺或先笑而後患有類乎宦之道焉故奕得之在早見先收宦失之以欲耽而不知止也故常對客奕以喻指東丘公好辯有口容與議天下事每屈之每先事言成敗利害與脩短興仆也卒之皆驗如其論云客或談科舉事則嘻嘻笑曰夫此道吾固已諳之矣命也夫命也夫吾平生最苦業卒不得意吾以俟吾子孫學有命者居數歲東丘公卒年六十有九以生于成化壬辰十月五日比卒年得今數云東丘公其先歛人其後徙崇德彭和橋安丘里不知始所徙者有六世祖顯忠生永

銘求銘生慶慶生璿是爲樂耕翁世以賢雄鄉里樂耕翁好施東丘公亦好施嘗折券以寬債人爲屋以居其流無歸者故今余氏子孫烝烝焉盛矣子三人曰懷忠娶趙氏曰懷孝娶沈氏皆明農曰懷恕大學生先娶鍾氏再娶沈氏獨懷孝早卒孫男三人長卽進士田娶胡氏畿聘鍾氏疆聘徐氏孫女二人一適胡泮一許聘曹應科曾孫一人公初配費氏繼配徐氏德清徐銀臺女也公子孫改公阡卜西安丘將以某年某月某日啟費氏窆共公丘藏焉史王子方受狀而田忽以憂歸旣一年田走价京師問曩所爲請

者史王子曰夫人死者形不死者銘銘曰

彼材可梁斲爲桷志遠途促隘騰踔千里之步空爾
學孰高者丘突嶽嶽其中藏者楚之璞宰木蕭蕭鳥
剥啄

明四川道監察御史雙洲嚴君墓志銘

監察御史嚴君者朝邑人也名天祥字叔善以所居
望仙觀在洛渭二水之間因號雙洲嘗稱以爲人能
脩潔其躬比于洛渭斯可語士矣以故嚴君脩謹平
生無滂節辱行皜然若處子云嚴君中嘉靖甲辰科
進士除爲山西絳縣知縣旣三年徵去一錢不著于

身去之日父老遮道攀留者以千數嚴君持法不假
借常約束吏胥竟嚴子去兢兢不敢縱以此百姓戀
之已而選爲四川道監察御史居三月嚴君忽鬱鬱
不樂或問嚴君曰君官御史何不樂也嚴君應曰官
御史可樂今且責我以能其官樂乎吾亦有所覽觀
思慮夫鸞鳳鷓各有所稱皆著其能吾將柰何是
以弗樂也久之嚴君病嚴君父曰堯黼黻直菴母李
氏弟天祐舉人嚴君生而孝友六七歲李嘗病罷食
嚴君跪而進食不食輒泣食乃起一日天祐病嚴君
身奉湯藥夜三起問之惟恐其弗聞也嚴君病在京

師直菴公聞乃跨馬馳來視病留天祐事其母李是時六月大暑嚴君相見泣曰憶翁何觸熱爲也兒病固無害殆傳者誤翁耳尋問母李及弟天祐語刺刺惻惻淚數行下移時不止直菴公居月餘而嚴君病少間歸旣歸乃復遣天祐來視而嚴君病忽劇遂卒天祐來不及訣才數日耳天祐撫棺慟哭曰嗟天乎吾兄何負而遽令至此乎嚴君配曹氏無子有二女皆幼皆隨居京師天祐乃扶櫬載嫂若女俱還以庚戌三月十日葬嚴君于望仙觀之東從親新兆也其後一歲餘曹氏坐哀毀亦卒天祐啟其窆與嚴君合

馬初嚴君且卒也曹氏提二女伏牀哭嚴君亦哭有
頃誠勿哭徐言曰吾視吾弟厚吾弟視我又甚謹必
不令若等無依也吾死而還骨于家其告父母以天
祐之次子允恭爲吾子立之於是直菴公竟與立如
嚴君言嚴君舉進士時余識嚴君子稠衆中敬之旣
嚴君爲御史病卒余與長安人王給諫于臯偕視棺
殮哭之成禮然後去已而天祐至遂請王給諫狀其
兄之行攜而同乘吾門乞銘時卒不能應去越三年
而余遷官南都便道還華下天祐渡渭造請者三泣
曰先兄所不瞑目于泉下者獨俟先生一言耳幸以

慰死者而絳縣人又言嚴君方在絳縣時恒以役至
夏縣道經傳說祠側嚴君必入拜徘徊瞻望顧有曠
世相感之思焉一日復過屬有急不得入拜憇其側
短亭中坐見二青衣持檄伏堂下白云傅丞相要公
嚴君謝不往顧左右賜使者食左右實無所見以爲
嚴君作鬼語然不敢詰第應曰食使者矣嚴君乃語
二青衣還報傅公異曰者竢我爲御史乃往矣言訖
就寢頃之寤呼左右大驚汗出述夢中事左右白云
自未寢時有之非夢也嚴君默然誠左右勿泄卒而
從行者始傳其事由是觀之嚴君甫爲御史輒鬱鬱

不樂者蓋斯念哉彼其稱憂不能官者托設也嚴君
生正德甲戌十二月十六日卒嘉靖己酉十一月十
九日年方三十六耳女一許字樊氏一又夭蓋重可
傷悼焉乃爲之銘曰

人生而良惟神亦慕翼翼嚴君傳要于路傳跨箕尾
嚴乘煙霧翱翔九虛以遊以悟彼衆弗知歎息嚮顧
杞梓俄摧驂駟窘步我解以文刻置新墓有來觀者
茲石可寤

明封戶部廣西司主事懷朴康公墓志銘

懷朴康公者初爲行省掾已而待選吏部授冠帶歸

而懷朴公顧讀書頗解其大指所與游盡里中賢士
大夫諸以掾與者弗敢望也有子三人長子曰脩吉
仲子曰迪吉叔子曰貞吉脩吉貞吉皆爲諸生而仲
子爲太原太守先獨顯初仲子拜爲戶部廣西司主
事而奏滿于上也乃得封懷朴公戶部廣西司主
事如其官母胡封安人當是時懷朴公與胡安人俱
在家仲子乃函制詞具冠服再拜遣使而將以獻
之旣至懷朴公懽甚遺書謂仲子曰自吾康氏以棗
強來而徙居章丘抵于余五世矣歷五世而未有顯
者余大父樂嘗有志于功名之際負才氣不與庸衆

伍以爲青紫事可俯地拾也竟弗遂卒余父鉞嘗語
及大父犖犖之槩未始不泫然泣愴然歎也乃至今
發于爾乎爾小子今服在郎位受 天子恩深重而
余又沾被若此爾小子能無念哉康仲子得書未幾
何時 上命之使監歲漕于楚於是便道歸章丘壽
懷朴公壽之日康伯子康叔子皆以次進觴諸孫皆
列拜在後乃懷朴公持觴顧獻欵欵感動弗能止仲子
請所爲感者何也懷朴公曰吁今所饗往余事吾父
未有也及吾父旣老而家計益縮吾嘗傾身致其旨
猶竟不能快吾志矧乃有今日邪言訖諸子復進觴

懷朴公醉康仲子侍懷朴公未數月遂辭而之楚已而還又使往監姑蘇稅康仲子乃又歸壽懷朴公又以郎中使雲中乃又歸壽懷朴公方仲子使楚時懷朴公問之曰爾今往何事曰爲公家榷財利耳懷朴公曰嗟乎語曰利令智昏爾小子慎哉初吾爲掾而同舍者醉而歸而投金于余忘之矣旣醒瞿然驚起仰天頓足曰吾失金吾失金余乃出所投金予之同舍者喜且謝曰卽君不出金吾安所索乎讓之半不受爾小子其無忘余所持者可也以故仲子三使于外咸以節廉自好稱懷朴公之教也懷朴公爲掾時

有方伯者令之視獄囚其時六月而會又大疫懷朴
公白方伯錄輕囚出就外約疫已復來方伯聽焉疫
已囚出就外者果復來得不死者百餘人及康仲子
陞爲太原太守使使迎懷朴公與胡安人俱來居郡
閣凡懷朴公所爲誠語太守君者盡皆寬仁長者之
道彼其志自爲掾時已若此矣懷朴公居太原踰一
歲而思歸曰吾除吾先墓上荆榛耳太守君不能留
乃輿之歸胡安人從懷朴公歸乃輒造先墓下祭以
其祭餘會族于墓下因問其貧不能娶死不能葬者
振給之已乃與里中人會而里中人固罔不敬服懷

朴公者懷朴公爲人寡言笑平生未嘗有墮行儼德其訓里中兒則數稱孝義恒在口不置令懷朴公不拜封貶得從仕籍歷良社之寄其道化所漸惠澤所加卽詩書所記何以尚焉懷朴公歸章丘之年嘉靖甲寅歲也太守君思之甚乃使使問焉使還報曰家大人病太劇太守君立解印綬白兩院且歸而侍家大人病兩院弗之許太守君曰卽弗許吾豈以一官忘吾親哉遂馳去去太原旣二日而舍人以訃至太守君從馬上聞墮地哭極哀已且行且哭焉旣抵喪所觸木哭已伏胡安人前哭胡安人勸勿哭以仲子

遠道來也久之仲子與伯子叔子議葬事而先圖銘
仲子以書抵余曰先生舉吾成進士吾先君未能忘
也顧不幸不獲與先生晤先生不識先君之爲人何
若也於是吾爲狀狀先君願先生相其事銘焉先君
諱濟民字惠之季年睹俗之靡靡而距今遠甚也於
是乎緬思古人而因號懷朴云卒時年七十歲矣有
孫男子六人孫女五人孫男子六人者大有大壯大
受大阜大田壽穀也孫女五人有三人者一適仇瑁
一適生員白汝玉其適馬夢鱗者則先君愛女也凡
所適皆同邑大家子云余按狀則懷朴公者蓋斷斷

乎古之篤行君子也其胤緒繁昌若此固宜有之乃
爲銘銘曰

誰則投種而歲弗田誰則持券而物弗還卽有大侵
彼種亦沒所寄者亡而券徒揭唯德之報靡爽靡遺
不于其躬于其嗣而奕奕康公是其元龜以告來世
刻此冥詞

明王孺人趙氏墓志銘

王孺人姓趙氏西安前衛人也夫曰平石公生子曰
鶴事 今上爲給事中初平石公往來賈江淮間三
歲中率二歲在外不得教鶴學而鶴少雅馴天資甚

美乃孺人自持家事教鶴學孺人誠鶴曰夫女之績也絲分而日治之則大帛成安有疎慵子成器者乎鶴奉教唯謹學既十年而舉進士是年甲辰歲也進士守次銓部念其父母乃遣使往迎父母而平石公又往賈江淮乃獨載孺人來進士卽復爲書抵江淮請平石公云孺人已自其家至而平石公賈方快不來有頃進士授行人奉節使朝鮮而留孺人京師以其婦周氏侍比歸納節孺人檢視笥中惟皇華集數卷及去時衣帶圖書而已孺人問曰夫稱皇華集者何也鶴應曰古者送使臣則歌皇華之詩今集紀朝

鮮陪臣贈言故倣而稱之夫贈言何謂也行人爲攜
行李蕭然及腹貯冰霜句義解說之孺人則大喜稱
曰兒今勅志若此不直揚名異域且與 邦家增重
矣明年行人使河南便道奉孺人歸長安會平石公
亦自江滙來行人日日爲稱觥謹燕居無何行人當
還報 命乃請與父母俱平石公倦游又以官所局
促固不許孺人乃遺平石公侍兒與行人如京師又
明年行人遷爲給事中給事中有論白 上輒嘉
納平生逡逡謙溫口不道人短至搏擊媿邪則貴近
弗避也孺人重愛子常以爲憂居三年而孺人病給

事中方謀歸孺人而病漸劇遂卒給事中伏于舍苦
哭甚哀旣殮則念平石公獨在家年老懼聞訃傷其
心乃卽復遣使問慰之給事中余所舉士然又同關
內人孺人居京師余母劉孺人嘗與相迓母劉謂余
曰今見王孺人端雅莊嚴殊不類婦人固宜其子若
是也卒而母劉爲傷之給事中將扶襯歸葬乃杖而
乘門請余銘投以狀狀稱孺人生弘治壬子十二月
十九日卒嘉靖庚戌十一月十九日年五十有九初
有三男子其二早夭給事中有男胤吉聘舉人黃勅
女有女許聘張四維給事中泣曰母卒時戀戀二孫

最苦矣墓今卜長安木塔里葬得吉嘉靖三十一年
二月初八日也銘曰

維趙氏先世有顯人王父岳岳作藩八閩本家鹿邑
來遷于秦彼大父者氣亦大振比及孺人家休未泯
誰謂閨處識達群倫誰謂不學勗子克臣出入京鄉
翟弟朱輪有輝載路或歎或珍南山之丘鬱乎嶙峋
孤魄歸是子也傷神傷神何爲曰咨二親生不恒偕
沒復一身嗟乎過矣萬有終藏千秋萬歲隻者竟雙

王氏第二妹正儀壙銘

正儀之父曰文菴翁兄曰槐野子文菴翁以嘉靖七

年卒卒時槐野子爲諸生有三妹一弟一男子焉男子名曰逢春東氏婦出弟名曰寶子寶子與槐野子及三妹同出自太孺人也太孺人且欲名三妹命槐野子各相其德性以爲號於是槐野子號第一妹曰溫儀號第二妹曰正儀號第三妹曰慎儀太孺人皆頷而是之已乃曰吾甚愛少兒珍惜之可名寶子以見吾志寶子則太孺人自爲號者也寶子以文菴翁卒之年天明年逢春天於是東氏婦坐哭子病成沈涸之疾不治其後數歲槐野子旣登第拜官翰林矣而第一妹溫儀卒于家葬在厓坡祖墳之側焉於是

槐野子遣使奉迎太孺人及東氏婦與在者二妹俱入京師居一年槐野子以使事如關中乃復奉太孺人還關中諸侍太孺人來者皆從有頃槐野子當報命甚急乃單車馳而去既去之明年而東氏婦卒于家太孺人哀苦之數遺書督槐野子歸於是槐野子請告歸遂得葬東氏婦焉初東氏婦未有葬所也槐野子乃從兩術人行視諸山皆惡不吉一日出古城南過始祖墳下兩術人問曰是爲誰槐野子曰吾始祖副使公墳也兩術人遂下馬登古城四望則太華在其東太白在其西少華正值其南此旺氣之所鍾

法所謂吉祥善地也卽此可以聯置一墳地又何求焉葬東氏婦于此宜槐野子乃徘徊瞻顧脉脉私念曰昔先大夫文菴翁卒時余爲諸生貧草葬之今旣獲吉壤矣柰何先以厚婦人也於是與術人議以斯所遷先大夫逮及後余卽附焉術人曰可哉乃卜先大夫穴立石表之以須吉歲已乃葬東氏婦卽余後宜所當者穴也東氏葬未逾年而第二妹正儀卒乃卽以小姑從嫂附在東氏之側蓋幽魂相依云後十五年而槐野子之女淑姬亡槐野子別爲淑姬卜葬地得所謀且並遷二妹來與淑姬共域乃以請太孺

人太孺人曰今二姬亡歿久矣骨且欲朽矣獨柰何
搥動邪矧温儀墓與族姬毛娣之穴隣正儀又依嫂
咸稱帖帖可毋動槐野子唯而退已復思正儀墓適
當先大夫宜隧之道卒不得無動乃復請太孺人温
儀墓不遷遷正儀太孺人然之於是乃遷正儀益居
在淑姬之左矣太孺人曰今遷正儀去如東氏婦孤
何槐野子曰嘻東氏婦敏惠明于大義百歲之後且
須我而偕也何謂孤顧獨念温儀與正儀隔在兩域
耳斯固可傷哉淑姬生也晚識慎儀不識温儀與正
儀然同氣所生神魂則未始弗投也慎儀今適茂才

東體章氏矣淑姬死哭淑姬聞遷正儀則又哭正儀
聞温儀不得遷又哭温儀其言曰吾同胞子四五人
獨我與兄氏在矣於乎三十年來骨肉損銷寥寥落
落譬猶晨星秋葉存者無幾余臨石蓋深痛之焉銘

曰

汝棲未安汝骨已寒徙汝實難汝悲汝懼汝姪若蘭
偕汝團欒二封等密來者聳觀坐亦有盤沐亦有瀾
豈不痛汝卜茲良寬

長女王淑姬壙銘

王淑姬者槐野王子之第一女也王子在翰林時居

在京師高坡巷而淑姬生淑姬生彌月而背發細瘡如粟大者如豆且落且又生淑姬日夜啼乳母抱淑姬出房中露立則啼止醫視之以爲胎毒其出房中露立而啼止者氣不鬱而毒暫解也無憂用一七藥可愈然自後諸瘡悉不能害矣以臟毒盡泄故也旣三歲而淑姬復發痘瑩瑩如摩尼珠而又稀疏未七日而收果無害明年王子奉太孺人歸關中淑姬已離乳母懷能自起拜識人顏色矣然恒依太孺人前太孺人念王子旣四十未有子而獨有淑姬於是愛淑姬特甚凡起卧食飲淑姬未嘗不在抱也頃之

王子復奉太孺人居京師而淑姬從年九歲能刺繡而里中舉人東體忱以就南宮試爲其中子聘淑姬許之其後王子遷春坊諭德令其署守南京翰林也淑姬復從太孺人居南京旣半歲余不得一見淑姬面余問太孺人淑姬何爲云曰坐窻下事刺繡耳侍婢三四人莫敢擅出入也太孺人以不習南中水土思關中余乃輿太孺人歸而淑姬從余送太孺人至江上入舟中拜太孺人太孺人泣淑姬亦泣淑姬牽余裾且拜且問曰阿爺何日歸遂別明年二月太孺人年七十而余留滯江南不得身爲壽乃遣使往壽

太孺人使旣已還報乃因間言淑姬亡余大驚問淑
姬安病曰病疹疹幾發乎曰九發嗟乎往醫嘗言臟
毒盡泄後不爲害矣乃卒坐此夭滅亡邪命也夫命
也夫頃之會有 詔令王子還守宮坊講諭德之事
於是王子遂取道歸關中拜太孺人太孺人守淑姬
棺大呼哭余環棺持太孺人哭哭已太孺人爲余言
淑姬病旣篤固不肯令醫視醫來輒以被蒙體從被
中嗚嗚哭太孺人懼傷之令醫出醫竟不得効其能
凡病十日而亡且亡之五六日氣喘逆不能出一語
第口張目動淚淋淋下不休忽而握太孺人手胡廬

而言曰死則死矣獨恨不得見我翁耳太孺人言旣與余復抱棺哭左右視者皆大哭居五日余請術人占葬所得之祖墳之東少華山之麓術人云茲山氣太盛恐非少女所當請徙下方余是之余念淑姬生長閨中而瘞在山下魂單骨寒笄笄靡托乃徙前亡第二妹孺正儀權厝在祖墳之側者與淑姬共域棲正儀居左淑姬居右庶幾乎雙玉相依萬禩永寧矣淑姬生在嘉靖壬寅九月亡在甲寅三月年十三歲耳悲夫銘曰

維壽維夫是誰主尸旣温旣惠又何大爲天乎難問

人莫之知我淚懸河厚土以滋生不踰閩焉識路遠
矧茲中野逝將獨之爰有姑氏徙與比居夜月游魂
珮環相隨無震無恐無阡于危千秋萬禩體其未綏

槐野先生存笥稿卷之十

槐野先生存笥稿卷之十一

左輔王維楨著 館甥渭上南師仲編

傳三首

孫忠烈公傳

王太史傳

西峯張公傳

傳

孫忠烈公傳

孫忠烈公者餘姚人也名燧字德成爲人沈毅有大
畧而與邑人王公守仁錢塘人胡公世寧同舉于鄉

正德丙子孫公以都御史巡撫江西也會寧庶人宸濠反孫公伏節死人至今壯之云宸濠者驚害多知人也好生事不靖術人有李生者揣濠知其指乃爲妄妖言諂諛濠濠喜厚賞術人因以其言起陽春書院以當王氣濠由此乃爲反謀焉濠府中宦者劉吉南昌人李士實王春皆阿濠畫計曰大王卽欲有所爲可先請復故護衛之奪者以嘗 上指幸許卽有兵其他以漸圖之是時正德甲戌也 天子嬖都督錢寧樂官臧賢兩人擅權用事濠遣人賂兩人兩人爲矯 詔復護衛如故濠見計遂爲謀反滋甚而士

實等固言安福人劉養正有才畧知兵濠乃招養正而養正益爲妄言諂諛濠大喜日夜集吉士寶春養正四人與計謀乃招納四方有梟亡脫及勇力材執之子各數千人爲衣食居處諸司頗皆覺知然憚不敢發也是時孫公方爲河南布政使而胡公世寧爲江西副使胡公乃陰上書告其事濠聞卽復遣人賂兩嬖人因遂陷胡公謫戍遼東濠懼觸衆憤不便乃復開館延士爲講聖人之學明已能好善禮士若此也關中人故江西提學副使李夢陽者以詞賦高一代罷而寓居大梁濠使人請陽春書院詩其飾詐

要名如此有頃孫公自河南遷江西覩濠姦憂之乃
進諸司計曰卽濠發柰何當是時適副使許公逵管
南昌部中乃孫公卽又喜而令許公陰圖之而自下
檄部中無城者亟築無糧者亟畜無兵衛者可選練
丁壯居僻治遠者爲奏立縣治以便約束於是進賢
有城安義有縣縣各有兵兵皆有餉悉如令濠念孫
公每一令出咸爲已備又懲胡公世寧往事意孫公
必有奏乃置人要路密詰之由是孫公凡七奏皆不
得達奏畧曰夫濠列爲藩王親爲宗室至富貴矣
乃今所爲臣甚惑之府中使齎重寶往來京師者趾

相錯于路此何以故也鄱陽賊凌十一閔念四吳十三者吏捕之急濠匿賊于西山祖塋中吏不能得夫匿賊安用乎鎮守太監畢真由江西之徙浙江也濠厚贖爲別別時辟左右密囑畢真首肯之夫密囑背公厚贖結好非藩王所宜有也其他顯臬甚多不具論論今踪跡可疑慮者其後孫公見奏格益懼度濠旦夕且舉事乃令兵局徙兵器于他所益復下檄諸郡設兵備焉正德己卯言官言濠不軌也 上遣重臣往欲奪護衛按其事濠恐乃召吉等四人謀曰今使者來卽訊我乃翁事敗矣不如遂反四人曰然因

共定計迨壽濠之次日鎮巡諸司咸入府謝晏濠乃
伏賊兵于殿內諸司拜未畢濠奮膺高足立露臺大
呼曰方今天子巡幸在外太后召我監國汝等
云何於是孫公抗聲對曰既有詔請出詔令衆
觀之濠見孫公不可奪素亦憚許公乃以問許公許
公曰是安得此悖妄之言乎吾有赤心豈從汝反耶
濠怒叱賊兵縛孫公許公孫公奮臂推縛者指濠罵
曰汝賊且不見天乎天無二日吾豈有二主哉吾死
一身耳且見若種之漸滅也濠怒甚縛者持銅錘擊
折公臂曳公及許公至惠民門外害之其時同謝者

或從或默濠立卽僞授劉吉太監令提督軍務李士
實國師王春劉養正俱僞授軍師令人詣兵局取兵
無有乃括民間農器炊釜造兵器歷二十日始就濠
乃從妃婁氏宮人百餘人登舟趨南京又留兵守南
昌遣所親婁伯之橫峰招兵道出進賢城進賢知縣
劉公源清殺婁伯而濠兵先鋒攻安慶者又不能下
濠甚憂焉其時巡撫贛州都御史王公守仁以行部
道聞變乃卽駐節吉安移文遠近令各以兵赴義於
是諸郡練卒一呼響應居一月兵集數萬所過供餉
未嘗乏絕則皆孫公前爲之所也於是吉安太守伍

公文定製孫公及許公木主于文山祠率所集兵以
文哭之諸軍皆感泣因遂督兵至南昌擊破之兵入
濠宮人留宮中者多自縊死濠駐兵王家渡聞南昌
破悵然曰大事去矣我安適歸矣於是泣下官兵遇
濠于樵舍風逆官兵戰不利俄而風順王公令實茅
千舟順風舉火濠兵焚溺死者無筭妃婁氏赴水死
濠易舟挾宮女四人而遁官兵追及濠投水水淺濠
不死遂併宮人執之劉吉李士實王春劉養正皆就
縛而凌十一閔念四吳十三等脫而至安義安義人
縛三賊獻俘事聞 天子念濠懿親不欲加誅令自

裁諸與濠通謀者皆以輕重伏誅李提學答濠詩有
規詞免臯其入濠府中謝晏默而不能抗義者皆減
死謫配居無何而 教皇帝棄群臣不及錄孫公今
天子卽位首褒孫公贈禮部尚書謚忠烈 詔江西
爲立祠賜額曰旌忠與許公並祀之廕子堪錦衣衛
千戶世襲公配楊氏封夫人公赴江西時不以夫人
隨公死報至楊夫人哭之哀其時昧旦天劃然忽斷
炯炯若日見者譁曰天眼開矣以濠就擒日考之則
此先未擒一日事也子堪徒跣赴難至而濠已擒伏
公棺哭之乃更治棺殮啟棺公面顏若生異香蒸蒸

自棺中起江西人大詫焉以爲鬼神不欲死之也初
孫公至江西治廨舍得古鏡于深溝中背刻二十有
四字其文曰光運忠扶日月心感天揚賁忠獨難塞
天不世內靖斯以昭明字畫奇怪觀者多不識後孫
公死好古者以意辨之其文乃著焉孫公自始仕歷
七官皆有大功德具在國史中孫公三子長子堪今
官都督僉事仲子墀尚寶卿季子陞吏部左侍郎三
子者皆天下士也豈天子以報孫氏哉胡公世寧濠
臧後復官卒至兵部尚書王公守仁封新建伯
論曰夫孔子不語神非無神也有之而弗語之也世

傳弘治壬子浙之文塲中夜旣半塲中人見東西立
巨人二人衣緋一人衣綠合言曰三人好作事已
忽不見是年孫公胡公王公遂同舉卒之寧濠之變
胡公發其姦孫公折其氣王公平其難三人相次成
功二巨人告之矣豈非神哉夫奇瑰非常之士不可
恒有有之皆天帝意也彼修一職立一節者豈不謂
賢以扶世翊運能哉

王太史傳

王太史者無錫人也名立道字懋中舉嘉靖乙未進
士已選爲翰林吉士是歲天子躬御文華殿授簡

命題校第諸進士乃得選者三十人而關中人王維
楨在其中時李文康公在內閣月試吉士凡兩而顧
文康公典教書李公文尚溫夷爾雅詩婉切乃懋中
文卽溫夷爾雅詩婉切適與券合一試輒冠吾嘗再
試再冠又再試又冠如此至五而顧公又數數稱譽
之由此名顯楨竟試與懋中同案懋中見楨作至閣
次則恒獨居後爲歎之已規曰子第易子手卽可前
不易不前也乃楨固不易其後懋中授編修楨亦爲
檢討懋中旣爲編修列史職稱曰夫太史之官立爲
其志一代之故集古先之鑒也乃吾今守其事矣隘

而罔識闕而弗修如職何於是卜僻遠居盡括古墳
籍刺取之今事大者皆牒記客時過其門每見其下
楨也蓋自其爲士時日坐一小樓連數旬不下卽宗
黨造者莫得睹其面則耽嗜讀書其天性也後十二
歲爲嘉靖丁未太史自告起還翰林相見亟稱歐陽
永叔之文粹固須法詩談唐張司業劉隨州以爲質
而近及索其自作讀之果皆似敬之予亦出作觀太
史太史蹶然曰予自昔固不易而今乃如此太史爲
人靜定沈篤蔑世俗靡靡之好旣乃贖故邸復楨門
著述如曩時不輟居無何太史病肺楨說之輟業已

察其面霜白兩頰銷縮骨稜稜出又說之歸太史於是遂䟽歸太史號堯衢頃改海樵語曰脫吾疾瘳以請而得走錫山也將腰斧伐木于海之側群樵人徜徉足終吾年吾誓與雲霄冠珮絕矣䟽上未報而太史卒卽其年十一月二十四日也年三十八耳父曰九巖以禮部郎中自免家居太史居在京師遇一果一肉之珍不輒食必函致九巖公爲書訊其親必盥手焚香乃始書書就含涕封至天勝其孝如此與人交雖簡嘿艱合然心依忠厚得一善必揚之人有過則口悛悛不忍道一詞也是皆足不死乃顧死天道

誠遠哉太史美髭髯垂幾及臍貌癯而骨清曰者感
指爲竒將穹致顯融綿綿久也今若此則人相石室
之篇誣邪龍湖張公者太史舉主也病數自來視卒
哭之哀曰王生好讀書竟坐是死諸大夫聞者咸爲
慨惜曰才人死矣始與太史同選者今在京若干人
旣會哭其邸觀選又送之郊踰年而楨爲作傳太史
有二子一孺人唐氏出唐氏永州太守有懷公之女
荆川太史之妹先三年卒

王維楨曰余甚悲太史亡而靡有憾焉孔子曰朝聞
道夕死可矣太史病且革予入省其卧內見側案有

不
卷二
割取視之則自記病起加減除日次予問記何爲以
白吾親令寬之勿繫戚病子也會又 孝烈皇后薨
太史自枕上加素冠曰卽一日不死猶爲朝臣安可
以病廢儀嗟乎由二事觀之孔所謂聞道者非邪死
可哉死可哉世以壽命終者豈少乎若其罔罔泯泯
也誠何以死哉

西峯張公傳

西峯張公者兵部尚書半洲張公之父也諱海字德
涵童子時喪其母已又喪其父西峰公皆哭之成禮
如其大人鄉里咸歎而異之旣長益簡德其大而可

傳者十數種具在張氏家乘中故西峯公身在布衣而名列于賢士大夫之間非徒以子尚書公故也西峯公本姓張而冒蔡氏姓者凡五世究所以則張馬賜者娶于蔡氏而生子容子容未齠而張馬賜卒容孤無依蔡氏乃攜容還歸母家而養之焉張氏之後得不絕蔡氏力也故容長遂冒蔡氏姓矣其後子孫襲稱之而莫有返也尚書公旣舉進士欲復之爲書請于西峯公曰吾聞魯更其孟之字宣聖譏之范托張祿之宗太史鄙焉故河流上天而復歸之海謂其源也華葉滿柯而下聚之根謂其本也由是觀之蔡

氏不當久冒矣吾欲上疏去蔡而歸張敢以白之大
人願大人決之西峯公報曰未可也吾聞仁人不背
德而滅名義士不矜新而棄舊故屈子不去楚而衛
青不返鄭彼各德其所由興也輒去蔡不可尚書公
復請曰吾聞饗非其宗者神吐之祀亡其類者神怨
之令張氏之先怨蔡氏之先吐是廟祀空名耳神不
下也吾意在追本定祀而安集徬徨之靈耳復之可
於是西峯公良久乃報曰待竟吾世若去而復之未
晚也尚書公遂聽而罷之尚書公初仕爲嘉興縣知
縣而載西峯公與俱居一年而嘉興之政成西峯公

歡甚語其子曰乃吾今何患矣亟歸我亟歸我我將
依西峯之故廬樓焉以適吾志西峯當公之故廬故
因以爲號云西峯公歸二年而嘉興徵拜爲吏科給
事中給事中凡七遷而爲兵部尚書西峯公每于其
遷官則輒遺詩教誡之其大指要之奮忠報主顯
親揚名八言而已西峯公天資瑰異雖未嘗効于世
而當世匡濟之畧輒究其始終與之語卽習事之大
夫不能難而下也尚書公以節鉞之鎮兩廣也會其
時有安南之役而二三將事大臣咸相聚闕下商
勦撫之計未定而尚書公先發因便道過其家省西

峯公西峯公問曰聞之方有事安南信乎尚書公對曰有之顧其計未定或言勦或言撫卒之柰何西峯公曰嘻撫之便夫犁氏篡陳而莫氏又篡犁以力相亡以詐相吞固其俗也言勦則名其梟是用中國之治治之矣兵不得罷而怨毒日深徒以貽東南之苦耳不如撫之以安其志順其俗焉且有宣德之故事在可弗講乎尚書公辭行而至鎮所以其言白將事大臣諸大臣咸是之安南竟從撫遂定兵罷東南諸路得免轉輸暴露之苦者西峯公一言之功也其後數歲而西峯公卒且卒呼其弟津前告曰我卽卒若

可赴鎮所慰尚書云乃翁固嗒然化矣吾兒孝言勿
遽恐驚動傷其心已又顧諸子之侍者謂曰吾先江
西之冠帶族也其始兩世皆宦閩安之乃遂就候官
縣家焉既更五世而莫有振者余甚憤焉至于尚書
乃復興則續吾上世業矣吾復何憾目遂瞑後尚書
公自鎮所跣歸遶棺哭之哀已聞西峯公卒時語乃
于歲時伏臘爲壇以望祭江西之張氏當爲祖者而
別爲廟祭蔡氏之養容而存張氏宗者乃始上疏復
張氏姓如西峯公教焉西峯公以尚書公貴凡四封
卒得號爲兵部右侍郎兼都察院右僉都御史云西

峯公初封爲嘉興縣知縣後改封禮科右給事中當
改封時西峯公適游在京師乃攝衣冠而趣闕下
謝西峯公在前給事君在後朝士咸相顧驚歎以爲
稀覯至繪爲圖傳其事圖今藏西峯公家焉西峯公
生三子長曰經卽尚書公次曰綸次曰綱晚節衰老
而謝家事一聽之二季子獨與里中賢者年齒齊者
數人結社以觴歌往來彌曰怡怡會終其身云西峯
公卒時年七十有四益見至曾孫矣里中人稱曰西
峯公福星也西峯公壯時嘗渡江墮水水中一老人
扶之上得不死又嘗病疽甚殆卧而夢官卒二人擁

之行至一所屋大而堂高其上坐神人侍衛甚嚴問
執而至者誰也卒對神人大叱脫之謂曰此人有厚
德天帝且報之乃執之來乎覺而疽竟不爲害尚書
公嘗持二事語史楨史楨乃遂記之云

論曰余不幸不獲見西峯公而幸覩公之冢子尚書
公焉尚書公恢恢乎犖犖乎益古大臣之風也天
子方倚以爲國柱自六卿而下莫不推轂讓能焉神
人所謂天且報西峯公者非此事邪夫豪傑之見世
猶寶也生于國國光生于家家亢造物者恒珍惜焉
不肯數數生苟生之必有以也世嘗言鬼物不可信

以今張公觀之欲弗信得乎

槐野先生存笥稿卷之十一